



Editorial

Lalpa'n ahun gen piak utte chu thipbek in ngaitha'n

Bible sim ding Psalms 62: 5-6.

“Pathian hepina zal in Damna Aw le chia to zel thei i um ziak un Lalpa lopina ipia mausau hi. Maban ale hat zaw siam ah pan la khawm zel thei din tawmgai leh gunchu takin pang zing ding in i kichial uh ahi.”.

Nasem mi pawsal khat hin a bu buk sung in, a it ma ma apung(watch) asumang kha ta, bang gual in ahawl vang in amu zo tapuau. Zia phat achun, in pawlam ah kihel naupangte kiang achun a pung a it ma ma bu buk sung ah asukmang ahi danleh amu mu kipakman hoitak apiak ding in ahil ta, zia naupangte sia chu thakhat in aleng un bubuk lam adelchiat tau hi. Hun sawt tak bang gual in ahawl vang un amu dawk zo diak talo uh ahi. Amu zaw lo phat un pung(watch) nei pa chun, “hawl da mai un, kimu zo lo ding hitan na” tin ako dawk tai.

Alak ua naupang khat chun, “Pu,

hun khat ei pia kit in, ken khatvei atawpna ding in va hawl mawng mawng ingka” tia adawt leh aneitupa chun apha! piak ta. Hun chawmkhat zaw in zia naupang pa chun akhut in pung chu ahung chawidawk a aneipa ahun pia tai. Pung neitu pa chun “ bang gual la hawl a, khoi tak a la mu ahem?” ti'n adawng ta. Naupang pa chunle, “Pu, bangma ka bawl puai, thipbek chan ka kichut kawm in tik tik ti git kangai in, a gitna lam chu kahawl leh ka hun mu ahi” tin adawn hu tai.

A chung a chanchin ah pung mu na ding ah naupang pa thipbek cha um a tik tik ti agit angai gual hin, Christian tenle Pathian daw i gual bang ahi ihiatdaw theina

ding un thipbek cha Pathian tawh hun mat apawimaw dan ei hil un ahi. Tam vei tak itho daw uau pat Pathian tawh hun I mat khawm u chu ama kiang ah idawi I ki dawt uau, zia hi ei bawl piak in chuleh zia hi ei pian ti hi ahi deu hi. Pha tak in nikhat sung Pathian tawh la ki holimna haw chu enthak le chun Pathian kiang a ei un I dawt uh I dawt uh atam zaw ahi. Aman bang ei gen nawp ahem I ngai-sak sek puau. Pathian lungdawi bang ahi ihiat thei na ding uau a guka thipbek ah hun mat angai sek hi.

Ei uh I pauchap phat u leh Pathian in angai thak sek ahi ziakin ei unle Pathian in bang ei gen piak nuam uh hem ti thipbek a I ngai uh pawimaw ahi. Zia phat chuleh, Pathian in ei gen piak uh chu isep ding uh zia chu ama lungdawi lam ahi zaw sek hi. Ei

un idawi daw i gen uau himaleh Pathian thugen ingai sak sek-lo kiti hi eima lungdawi Pathian bawlsak go zawk ihu in, Pathian dawidan bang ahile ihiatlo diu ahi tina ahi. Thipbek a Pathian thugen ngaithak I habawllo ziak un hindan pha ihing dawk thei lo uh ahi. Ziaziakchun, Pathian lungdawi a hinkhua imat theina ding un thipbek a Pathian thugen ngai sak ding I kitiamnau chu ahi. David in “Ka hinna’n thip bek in Pathian bep a ngâk ah; ka kinepna chu ama ah kipat ahi ngal a. Ama bep chu ka suangpi, ei hukhingpa leh ka kulpi ahi; kilîng puang ka” tin agen hi.

--o0o--

Pathian cha I hinau aki lang dawk zo ta puai

1 Timothy 6:10 “Dangka sum ngainat hi gitlona chitin bul ahi ngal a; khenkhat in hausak nawpna ziakin ginna chu zamsan in, amau leh amau lungngaina tam tak a kisunkhum sek uh ahi.”

By: Rev. Seilunlal Vaiphei

A chung ah Pathian lekha bu'n ei hlnau hi I et chun adik khawp mai hi. A awnglai mun khat ziangle belap na ding mu zaw ding le a um talo ahi. Gingtute hinkhua nungthil leu hin ihinkhua pumpiu ahin sum ngai khawkna'n ei lua dim ta. Pathian cha ihi nau apat in i vak mang zo tau hi.

Khawvel khanto malchal na dungzui in tulai ahin Biakin hawi leh nawm pen hi na ding in i hapan thei ui. Sum crore bang zat lut ding hi ziang lehle ahawi thei pen, anawp thei pen, athupi thei pen, a etlawm thei ding pen in pan halak in ila chiat ui. I pankhawm na zal un Pathian Biak na ding thupi tak tak isa zing tau in ahi. Himaleh, vangsiat um na khat chu Biakin a nawm thei ding pen leh a thupi thei ding pen ah pan i lak zing lai un asung ah kikhawm ding mi um ta lo ahi. Kochuam in kin leh dawng thupi tak ahung guanggal phat leh Bi-

akin neu ziang sek, himaleh kin abei phat leh Biakin kikhawm mi 20 atinlo ni tam zaw sek. A thil um dan hi I ngaitua chun vangsiat um tak khat chu ahi.

Biakin kisakna sung ah sum lutzat i sim tuak chun a lakh/crore ah lut kiti bei talo. Himaleh a sung ah kikhawmte I et chun piangthak diktak mi tawmcha, gingtute chawndan ahi tia kikhawm ham ham le um da lo ding ahi. Biakin hawitak leh thupi tak sakdaw a Pathian kipaksak go tawh i ki batnau um sek ahi. Jawlnei Samuel lekha bu ah, Saul in thu amatlo ziaka ahina kipat paithak ahina chungchang i sim chun Pathian chu sum leh pai piak tam ziak, Biakin thupi tak sakpiak ziaka kipak ziang hilo in. Ama bou chu Pathian thupiak awi, athugen ngaikhawk hi thil pawimaw tak ahi. Biakin thupi zo lo maleh a sung ah kikhawmte lim leh kipak tak leh lungthim diktak pua Pathian achawihawi khawm

ua, ama ang ah kineusak kawm ah gitlo thupha chawi nachang hia te ziaka Pathian lungawi ahi zaw sek hi.

Gingtute hi sum ngain-atna ziaka vakvai den tam tak aki um ta. Sum leh pai anei kham kham ah kipak thei talo, aban hawlbe zing i tam tau hi. Thugen tu khat in, “sum mulo na ding ah Pathian ho akan na puai” ala ti hial in ahi. Ngaitua tiam un, bangchan in Pathian asu lung na ta diam? Sum mu na ding ah Pathian ho ihu ahem? ti thei khawp hial in gingu tamtak i um tau hi. MLA, MDC, MP hi ki chu thei chan in i kichu un, khenkhat in ahinkhua achan khalaw sek nalai hi. lawtinna ihung chan phat uleh la kuama’n gam leh mipite hepi tak tak um ngai talo. In chen siam na ding, hausak na din leh eima nawpsak na ding mai mai hileh kilawm ziang khawp in aki um sek hi.

Bible in, sum ngainat hi siatna bulpi ahi ti hi adik tak chu ahi. Sum hi neilo a khawk tak khat ahin, nei na ding ah le sepgim ma ma ngai ahi. Sum nei ziaka gilo aki hi puan, sum mu na ding ale sepgim le asia diak puai. Ama bou chu, apha

ding khat le alamlo a imat sek ziakun asia suak daw sek ahi. Bible in, “sum ngainat lung paw kiu in, la nei kham kham un lung awi dan kizil un” ati. I nei kham kham ah lungawi hi thilpha ahi khel ah thildang umtalo ahi. Tu’n idin mun uh vak ki gen taleh, nei kham kham ah lungawi khat le ki umlo mai thei ahi. Mu be na ding hawl na lam in mi tamtak ginna lam ah kinungtawl aki um ban ah eima leh eima lungngaina ding tamtak iki bawldaw khalaw sek ui.

Pathian chawihawina la phuak thiam, lasa thiam tamtak i um un, Pathian lungsiatna zal in akipunbe zing in kipak a um hi. Ahinla, Pathian in aw hawitak ei piak uh ama’n alopina puanzak na dinga eipiak uh ahilam hep-halo mitamtak aki um tai. YouTube channel isem un, subscribers hawlnan I mang un, sum muna ding bep in I buai zo tau hi. Ama lopina ding ah I aw mangcha nuam Pathian chu ihemil zo tau. Mihing pilna leh hiatna ahung khanlet zel tawh kitawn in, thugen thiam le nisin in akibelap zel hi. Pathian nasem ding natiangle law tampi piak ding ah zawl thei mi aki pungzel hi. Chun, kuan sum

leh pai atam deu ahung pia em? tia atam lam lam del ziang le mi bei talo ahi. Pathian cha ihinau akilang dawk zo tapuai. Bible in Jawlneite nek ding hawlnan amangthai zo tau ati hi tawh iki bang bep ziang tau hi.

Pathian apat bawltheina, gentheina piak ah um ihu hi, ei un business bawlna gual ah nei in, ei piatu Pathian lungthim bang tiang in ana tadiam? Jesu'n agen, "manbei ah la mu uh ahin, man bei man hawm zak un" ati ahi. Ziakiakchun, i hitheina zosia hi Pathian lopina ding bep a bawl ding ahi. Zia gual chu hitaleh ama apat kiam theilo malsawmna chu ichan zing ding uh ahi.

Sum leh pai, nei leh gou ihawlnau in Pathian ho ihina tiang uh i hemil ziang sek ui. Ei petu pa Pathian ahilam geldawk lo in eima hapan nazal ah loting ziang dan in iki ngaitua sek ui. Mit a mu lo ah malsawmna ei piasek chu Pathian ahin, Pathian alung awilo chun I neisa zosia le ei nunglak piak thei ahi. Tamtak sukpun guan khawl khawm go leu hinle mi dang a ding bep a khawlkhawm le ala kihi kha mai thei ahi. Zia gual chu ahi ziakin, taksan chaten Pathian cha ihinau

hemil lo in, I pau Pathian lungawina ah thil bangkim I bawl ding uh ahi. Eima bang gual in pan halak in la go ziang leu hinle I Pathian uh a lungawilo ahichun ahawmkeu leh panna bei gual mai hi ding ahi ti gel daw zing apha. Khawilai mun hilehle taksan chate ihinau ki langdawk zing ding in pan lathak hitiu.


--o0o--


“I KIDOPU’U CHU I SUAPI ALA HI SEK HI”


 Naocy Haokip


Psalms 3:1


Aw Lalpa, Ka melmate a tam ta nau e! Mi tam tak ei do dingin a hung kipan tau a.


 Zia Bible Chang hi Lengpa David achapa Absalom aki-ang ah apat azammang ah apa David a do chungchang thu a David laphuak lak a khat alahi.


 I kidopi, ikinakpi zing thei mi chu I suapi, I sanggam mama khat ala hisek hi, I hetphak lo khualgam mi michuam alahingai puan, I kiang I kawm ah I kinaipi I suapi chu eido gunset khat ala hisek hi.

 Joseph Aigupta gama ah kizawk mang a khan le midang ala hi puan, apianpi asuapi te mama khat ala hi.


 Hawitak ah I ngaitua leh lainat leh thasiat le a um sek mama hi, bang ziak ah hem I tile hetkhak kei lou khualgam min eisugenthei leh le bon, ki thuak zo lo ah, I suapi ngei ngei khat eido ah apan mai hi anat ding dan hi tepi ding le um ta puan ah.


 I lak ua mikhat in thilpha-chuam, khantona ding khat bawldawk, ahilole asepnamun apat kaisang, naseppha sem-dawk chuleh thil dang dang khat to ahung um phat leh ahung kipakpi tak tak te chu a suapi a kinaipi sangin midang a chanau kinaipi lo te ala tam zaw sek hi, A suapi te vang chu thangsiatna, sumsialna’n adim sek un asuapi dona lungthim ala paw kha sek hi.


 Midang namdang te chula kahe puan, eih lak kitileh adiak-in khristian a kiminvua gingtute lak in a atam diak sek hi, Bible’in “kithangsiatna masanga kua hem pang zo ding?” ati chu I la hi kha sek ui.


 Isuapi khat khantouna masawanna chung a kipakpi sangin thangsiatna, duamna I dim sek ziak ua hin I khantona diu zousia ala daltan kha sek hi, zia hin khantona umlo hial ah melma eisua in, atawp leh suapi le

suapi le melma a ki suak khaw-law sek hi.


 Thangsiatna, duamna phatlo dan hile genlo hial in hechiat ngei ding I hui, Bible ah Eli-sha suakpa Geha'zi duamna, thangsiatna lungthim anei chu ihiau ah, zia tawh bang ah duamna chu amading bep hilouvin ama insung akhang akhang dinga vangsiatna, sapsiatna a tut zaw ta ahi.


 A Chunga Bible chang ngei hile I et leh Leng David ading ahin ana nadinge aw! Ama do ah pang chu kuama dang hilo-in, achapa Absalom ngei ala hita mai hi.

 Ziagual ah kidona haw hi ahungtung phatle athawkdan hi mi zosia mawk thiam ziang puan ah, zia gual natna hi I mihing chanpi kianga I genmun lai sia eido ding atam deu deu sek hi, a tawp leh sukdam zawlo mabe/meima a hung suak sek ahi.

 Ahinla Leng David gualin I natna teu hi Lalapa kiang ah I tut zawk diu ahi, Lalpa'n I dawileh I mamaw ahe nai,asia a pha a hian, I danau, I kipaknau a bawn in ahesuak kei hi, ziazia chun Bangkim hesuak Pa

Pathian kiang ah kipelut hitiu in ama a ki-nga zingleu hin, Aman ikhankhua diu a gel zing nai.

 Eido zing I suapi khat chunga kipak zing ding vang chu thil haksa tak khat ahi, thupil khat'in, "Isuapi ngaidam sangin melma ngaidam abail-am zawi," alati ahi, hinla I melmate Hepina I piakdaw theilai sia aluchung ua mei-am kawip-iaik kisuak thei ahi.

 Genuam tam maleh tuni a ding in zia chan hin chai tai tiu, asim zosia lungthim ah Pathianin eihilchian piak henla, taksa leh thagau ah malam zuan ah kal I suanbe thei na ding un zia article chawmcha hi Lalpa Pathian uh angsung in kahunglan ahi. Amen!

--o0o--

TULAI KHRISTIAN TAM TAK TE DINMUN

By: **KL Muana Khaute**

Khawvel pilna leh khawhei dan, gamtat dan, zulzau dan hi namenlo in a zallen ta, zia Thiangzau khawvel ahi kiti mai leh a dik thei mai dia aw ka ti chang a um hi.

Thilpha, thutak hinkhua mat ah khawvel kitaitetna lam ah masawna ding del sang in bail-am tak ah lawtinna leh a penpen hi ziang nawpna hin mihing a mapui ta hi in a kilang ta ti mai leng khiallo mai thei ahi.

Malai ah tawmngaina, thianthona, diktatna, nu leh pa zana, sang ah upa zawte zana, Pathian launa, kihepinate hi nasatak in a kiam ah, sawlchak Paul in, nang uh hi khawvel thuthang mai maite ziak in la bil uh sukn-gawng la hi tau “Kei Paul chu kidona pha chu ka zo tan, zawna Lallukhuk la ding ah chia di ka hitai” ati hi tawh I tulai khawvel chia dan hi lei leh van a kigamlat gual a bang tai.

Chun, nang uh le zia gual ma baw achun kitaitetna pha la zaw theina ding un haksatna gensenlo te zamsan in kumtuang bukimna chu tung thei ding in kunglam chu del ham un ei ti ahi. Zia chu nang leh kei khut in a um

ta ngei mai ah, a khawizawk chu tel di I hui em ei ma dawidan chiat in thupukna la mai tai tiu.

Zia khawvel lopina leh lalna te hi chung Vangam a I chan di tawh I tekak kham a hi him him puai. Khawvel nawpna leh lalna te hi khiak la kham ah ngailo te a ding in, Lalpa kiang lam zuan ham ham hi tiu. Zia chun khuaizu leh bawng nawi, sana dangka, ngunkhamtual lai a chun belum hawn tawh van Angel sim senlo te tawh lungkham beidawn um talo Lalpa ma hingtin zosia lengkhawm tai tiu. Zia lungkham-na ka na him a um ta puan, lim-tawp um talo di’n leng khawm dial dial di I hitai. Zia mun leh hun chu mithiangtho te chen nuam in a ngak la tau. Zia gam chu a hi ka kinepna chu Lala thuang ei pui tung mai tan. Ka khaulzin nau hi ka chim ta ma mau...piandang te tuallenna khawpi a chun ei hunlawp lut mai tan aw.

KAWPPI DING TÊLDAN THIAM A NGÂI HI

(Choosing the right mate)

 Manglienthang Touthang

Pathian thilsiam zosia lak ah mihing te hi thupi pen I hui ti ihet uh tawh kitawn in, khawvel Mihing te hi gancha, zu le va te zosia sangah kawppi beia ki umthei lou ahi ti chu ahi.

Kawppi ding lawi leh pai, suapi leh suapi, ahiloleh sepkawmpi ti in kawppi pha neiding le apo-mimaw nai, ahinla ziate zousia sangah thupi pen ah I gennawp chu NUNGAK LEH TANGVAL khat in inchen siamkhawmpi ding kawppi pha (good mate) I nei lo akhawc dân leh bang bawlleu hin ziatawh bang thilpha chu I chang thei diam uh? Ti a chawmlam tak in ala simkhawm hitiu.

Sapte thupil khat chun, *“Marriage license” is more important than driving license*” ti’n ala gen ui. Tulai ah gari khat tawl mai mai dingin le license kitup tak aneilou akhawc dan I het suak kei diu taksan aum hi.

Chuleh aban ah thupil agen kit u khat chu, *“Getting married is like getting blood transfusion”* ti chu ahi. Zinei kiti chu taksa a thisan thak kikap lut be tina ahi. Hospital ah thisan pawimaw te khu thisan zousia kimawc piak ziang

thei lo ahi. Blood group kibat pi hetmasak ngai, zia bep chu hilo in thisan chu hawitak ah etchian masak ngai ahi.

Ziaguala Nungak Tangval te a dinga insung khat siamkhompi ding kawppi apawimaw dan I het tak uh tawh kitawnin Pathian Lekhabu thiangtho in bang lam in ei zilti em ti ala en hitiu.

1. ZI LEH PAWSAL DING KITÊLNA AHIN PATHIAN MAPUINA APAWIMAW MAMA HI. (God’s direction is needed for selection of one’s wife or husband)

Proverbs 12:4

“Numei Umchanpha chu a pawsal lallukhuk ahi”n a pawsal himualphotu chu vang a gu muat sak gual ahi”

A Chunga Pathian Lekhabu thi-angtho achun jipha ahilole pawsal pha kimu chu Lallukhuk tawh kitekhin ahi. Zia guala mantam leh thupi kawppi ding chu

Pathian dawnglo ah I kimu mong mong na diam uh? Ti geldawk a, Zi/Pawsal pha muna dinga Pathian dawt hun ahitai ti I taklang ahi.

2. HINKHUA A JI/PAWSAL PHA MUNA DINGIN PATHIAN BEP TAKSAN MASAK PEN NGAI AHI (Only God can be trusted to get the rightful life partner for each one of us).

Proverbs 18:22

“Ji mu chu thilpha mu ah”n Lalpa doisakna chang ah”

Ji/Pawsal pha muna dinga Pathian dawt masak ah chuleh Pathian bepin in ji/pawsal pha eipia teiding ahi ti taksanna diktak neite chung a Lalpa apatin kipa-kna akimui ti chu Pathian Lekhabu’n ataklang hi. Tulai ji/pawsal nei zosia atamzaw chawmkhat lou a kisikna le kana I tuak zing uh hi a tamzawn Pathian I la dawt lou jgak uhleh Pathian I la taksan masak lou ziak uh hiding ahi.

3. KAWPPI PHATAK NEINA DINGIN NU LEH PA TE NA NGAWN HILE TING ZOLO NALAI AHIU. (Even Parents are not suitable for selecting a mate for their children)

Proverbs 19:14

“In leh go thilte chu pate ah kipat lua a hisek in, ji chingthei chu vang LALPA piak ah”.

Zia Pathian Lekhabu thiangutho ah I simdaw uh hi bang chana thupi a hem? Ngaitua in.

Achang leh Eima mimal lunggel in ji/pawsal pha I la hol sek un, achang leh Pathian dawng masa loin insung nulepa te phatsak ziak hem khat in ji/pawsal pha mu dingin I la kigel sek uh ahi. AHinlah Ji/Pawsal pha kiti hi vang Pathian thilpiak khat ahi jgak in, Pathian dawt hi pawimaw ahi ti geldawk chiat hitiu.

Tulai in khangdawng cha cha le dawngma toh kikhen ziak a kingaisia, ama le ama kithatnu-am ahilo leh Pathian nangawn le belnuam talo I gamsung un apung zing hi. Zia gual dinmun a I la din khak un le lalungthi-ma ladawinu ahilouleh ladawipa tawh laki ngai masang un Pathian kiangin dawngma pha ahilou le ji/pawsal pha neina dinga bang zatvei mawng mawng I la dawnkha tau em? Ti geldaw ngai ahi.

Eima’n I dawu chu Pathian in adawilo jawng hi maithei ahi. Pathian dawu I channa dinga vang

ama kiangah kingaitawm ah gingchakna neitak ah idawt zing masak pen chu thilpha pen ahi.

Pathian in zia article lasimna a apat in a hung hopi hi ti laki hetleh Pathian angsung ala bel zingin, Pathian in nang le kei a dinga thilpha guanggal sa akoi

ahi, adawn ding le ahawl ding chu nang le kei mawpuakna ahi.

Pathian in l bawn un hun mal-sawm chiat ta hen!.

SOURCE : RIGHTWAY CHILDREN MINISTRY

--o0o--

GINGTU HINKHUA AIGUPTA LEH SODOM NGAINA

 **Rev. Thanglianmang**

1. Israel ten Aigupta gam an-gainau leh Lot ji'n Sodom khawpi angai na.

Aigupta gam chu Bible sung Thuthunglui hun lai ah gam khang-to masa mama ginglotute khawpi khat ahi. Jakob cha Joseph kha jia gam a chun ala lut masa'n, a jaw in apa leh asuapi te zosia alut un, tichun kum tamtak suakin atang den tau ahi. Pathian in Mosia mangcha in Israelte chu Kanaan gam zuan di'n a puidawk hi. Kanaan gam atun ma'u ah Thalek mun leh mun khenkhat atun ua chun achang leh mi khenkhat te haw chun Aigupta gam ah gin-

glote tawh zu leh sa lim tak ah anek lai teu kha angai ngoi ngoi sek ui. Zia bep chu hi lo in Pathian in thilmak tamtak bawl jel ah pui maleh khenkhatte chun Jehovah Pathian chu gingla un, Aigupta te pathian Bongno lim chu ho in lim leh lam in a chawihoi ui. A taksa nopchennateu angainat ziak un Mosia chung in thil chuam chuam in aphunnoi ui. A gitlo bawl ziak ua chun Pathian in a ama taksang lo leh gingla te zosia chu azawtna mun uh, khuaizu leh bongnoi luan na- Kanaan gam atun ma'u chun asu mangthai siksek ta ahi.

Sodom khawpi chu Abraham

hunlai ah ginglote khawpi khat ahi. Zia khawpi achun Abraham suapi Lot chu acheng hi. Zia khawpi cheng te haw chu agitlo bekset zia un Pathian in mei leh kât in asu mangthai ta ahi. Lot te inkuan ahi leh chu Pathian in gawt lo in zia khawpi apat chun a vansolchak te sawl in azam daw sak hi. Vansolchakte chun Lot te inkuan kiang a chun nunglam kihei lo kei ah malam la zawt jel ding uh ahi ti'n thu apia ahi. Lot te inkuan atamzawte chu malam zuan ah chia jel maleu, Lot ji chu akinung hei in, Sodom khua a en ta, tichun, Pathian thupiak azuilo zia achun Chi Khuam asuak ta ahi. Lot ji akinung hei naziak chu bible in chian tak in gen lang lo maleh kum tamtak ala chenna a in leh lo te haw sukmang thai ah vak um ding chu angaitua zia hi di'n ginchak ahi.

2. Tulai ah ging tu hinkhua malai Aigupta gam leh Sodom ngai na kibatna.

Israel ten Aigupta gam ah achen lai ua anopsakna chuam chuam teu angai gual uh leh Lot ji'n Sodom khawpi angai gual khan tulai ah gingtu piangthak-sa kitite hin le malai hinkhua nutsa sa te ngaina kha abei diak

puai. Pathian ah khatvei sukvak hijiang leh hin le Pathian guala bukim ah thiangtho aki hi loziak in i malai nopnate kha achang leh ngaina aum thei hi. I malai hinkhua nopna phalote kha eima hinkhua themtu matchak poimaw pen ahi sek hi. Zia te haw dozo ding a chun nasatak ah Pathian galvan ah kithuam ding leh Pathian hatna bel akul in apoimaw hi. Hinkhaw masa ah nopna phalote gingtu diktak hi nunga a hung puang kit chu do zolo in gingtu tamtak chu nungtol hinkhua chu amang sek un, ada um ma ma hi. Mi vangpha deu te chu suala apuk kit nau apat tho daw kit in Pathian ah hoitak in aki mang kit un, khenkhat te vang thodawk zo talo in ataksa'u leh a thagau uh chu themtu setan in athi ni tiang un apuimang ta ahi. Zu dawn mi chu themtu chun zu ma in them tin, thanguai mi chu thanhuaina ma in thep in um in tin, nekguk ching chu nekguk ma in themtu chun them kit ding ahi. Chutichu ahiziakin, Israel te Aigupta gam ngaikit te athi gual uh leh Lot ji'n Sodom angai zia ah athi gual a khan tulai ah gingtute haw le i nutsa taksa nopna phalo te zui ah ki lekit taphot chu taksa leh

thagau ah mangthai ding ihu. Hebraite 10:37 na'n le "Midik chu ginna'n hing in ah, akinung le kit te chung in vang ka thagau lungdam puan ah, lalpa'n ati ahi".

3. Setan thepna zawtheinna ding leh thagau ah khanlet nading lampi te.

(a) Pauchapna leh pathian thu:

Hinkhua ah thepna chuam chuam te zaw theina dinga galvan phapen chu thepna zotu pathian kianga pauchapna ahi. Chuleh, setan hin le pathian thu ma mangchan thudik chanve in gingtu te chu athem sekin, Jesu ngei kha le pathian thuhing te mangcha in gamthip akhan athep ahi. Zia gual ma chun gingtu te haw le ei them jing ahi zia in ei hawn le pathian thu ma mang cha in, Jesu min sal ah i do chun setan in ei zo lo ding ahi. Zia ban achun, bible thuhing nisin ah simjing ah ama tawh kipol jing te chu setan in athem xo lo ahi.

(b) Gingtu te kipolkhom na pang jing: Gingtu te hi belum tawh tekhn ahi gual in ahawn ah kalsuan khom leh khawsa khom ding te ihu. Zia zia chun, gingtu te kipol khom na biakin kai te, kasak khom na te, pauchap khom

na te ah pang jing ding ahi. Gingtu te kipol khom na pan na chu midang apat thagau lam ah malam ah kalsuan jel dingdan te mu daw ahi.

(c) Gitlo pi loite kivoppi taklo leh gitlo bolna mun chia taklo: Pi-anthak hi nung achun malai ah loi leh pai masa te haw nutsia angai hi. Achu ti lochun, amau haw tawh kivop jing ah la um chun thagau lam ah piting lo la hi zia kin la lampi hawna sa ma kha zui kit chu abailam ma ma hi. Chuleh, gitlo la bolna mun te haw kha en le en kin la, chia le la chia kit lo ding ahi. Bangma lo ah ngai ah la chia kit ah, amun te akhan hun la va mat tam chun nangma thempuk tu hungpang kit jiangthei ahi.

(d) Thagau lam ah lithuk lam zawt jel ding: Jesun anungzui Peter kianga - Lithuk lam zuan in la len sep in ati gual akhan gingtu te haw chu pathian lam ah asung gil lam leh alai lam thagau ah zawt jel ding ahi. Taksa i hinkhua nisin ah alet deu deu gual in thagau lam ah le nisin ah malam sawn ding te i hui. Tukum ah thepna khat i zaw chun thepna dang hung tung ding te chu zo jel dinga kisingsak ding ahi.

Pathian lam ah thagau ah kisoiz-oi ah i thini ding inai tiat tiat leh thagau ah le hat tiat tiat din i ki singsa ding ahi. Pathian thu hetna lam ah te, pathian tawh kipol na

pauchanna lam ah te leh Pathian pakna lam ah te malam sawn din lalpan ei dawi ahi.

Lalpan sim tu te malsawm ta hen.

--o0o--

KITUAK LO NA HI MIHIAM SIAMDAW AHI

-Dr. S. Chongloi

Malai in Temple (Hindu biak-in) lui khat a Vapal tamthim acheng un. Chawm khat zaw in zia temple chu sak phat ding in ahung phel tau a, ahileh Vapal te chu Church (Christiante biak-in) a akichawn lut tau a. Church chunga ala cheng masa Vapal te chun phatak chan ala lamtua un nuam tak in ala chen khawmpi tau ahi. Hun chawm khat zaw in, zia Church chule athak sak ding ti in ahung phel tha kit tau in, ahileh Vapal zosia chu Mosque (Muslim te biak-in) chunga akichawn lut kit ui. achunga Vapal ala cheng masa haw chun le ala haw diak lo in hawi tak in ala chen khawmpi zel ui.

Chawm khat zaw in Muslim te Mosque chule athak asak nawp

ziak un ahung phel tha kit tau in, ahileh Vapal hawn chun chenna ding aneilou phat un achennau masa Temple (Hindu te biak-in) chu ala kisa zo tan ava nung chen kit tau ahi. Nikhat hi chung lama aum lai un Vapalpi chun anuailama mi hattak a kidel haw chu avak musuk in akianga Vapal nou neu khat in Api kianga chun, "Nuailama kina te khu kua ahiu vem?" tia adawt leh api chun, "Mihing te haw ahiu" tin a dawnhu hi.

"Mihing chiat hui a bangatia kina ahiu em?" atileh, api chun, "Mihing chiat ahi vang un, Temple a chi ate khi Hindu akitiuvin, Church a chia te haw khi Christian akiti kit un, chuleh, Mosque a chia haw khi Muslim akiti kit ui" tin agen

tai. Zia phat achun Vapal nou chun, "Bang atia khuti ahiu em? Eiuh la Temple chung a icheng un Vapal iki tiu a, Zia zaw achun Church chung a icheng kit un, Vapal ikiti tho tho un, chule Mosque chung a icheng kit zel un ahi vang in Vapal ikiti tho tho kit ui, chuti ahileh ama haw le khawi taka cheng ziang leule Mihing a kiti tho tho diu hilo ahem?" tia adawt ahileh, api chun, "Nang leh kei hi Vapal ihu a eisiampa Pathian ihet ziak un khawi mun ah cheng leu hinle ikilem tuak ua chamdial a' ichen khawm thei uh ahi. Hinla mihing te haw khin Pathian hawi taka ahet nailo ziak un, kina leh kithat tua ahiu" tin anou kianga chun agen tai.

Chung a, tuanthu gual ahin i mihing hina ki hetmil kiti hi ei siampa hetmilna ahidan ei hil ahi. Mihing hi Pathian in alim le amel pu eisiampa ahiziak in ihina hetmil hi eisiampa hetmilna ahi. khristian ihu a Jesu nungzui ihi nalai un, ziak achun kua lim le mel pu ihu em ti phatak chan ngaitua hitiu in Biak in ah ichia phat uleh le alim le amel iputpau mi ten amudaw ziang theina ding un imihing hin nau hemil lo a i hin khuau mang chiat thei ding in iki chial uh ahi.

--o0o--

“Lei hi thim in khû in, mipite chu thimna sâ tak chun hun tuam intin; himaleh, Lalpa vâk in hun sal in, a lopina chu la chung un hung kilang ding ahi.” Isai 60: 2

~Rev. Seilunlal Vaiphei

Pathian mapuina zal in kum leh tha te hung chia zel in Lo nate sem leh bawl in mihingte i buai ma ma tau hi. Himaleh, lei go thil chau buaipi ding in Pathian in achate ei phallo uh ahi. Taksa lam i ha lunggul tak luat chun ei siampa nasepna lam ahin, taksapna alian ta sek hi. Zi-aziakchun, tuni hun ahin khawvel ah thim thil hithei na nuai ah mihingte khawsak ahasat dante tamlo cha ala enkhawm hitiu.

Thim nuai ah umte din mun:

Tuni hun ah i gen nawp pen chu khawvel ah khawsa mihingte ihi naklai ziakun lei lam thimna thu'n ala holim hitiu. Gen ding tam tak um maleh anu-ai ahin pawimaw diak kasakte tamlo cha chawmkim chan ala en hitiu.

Thim nuai ah umte chu a kimutua thei le a um puai (Exodus 10:22-23):

Exodus ziak na lam i

etchun, Pathian Nam tel Israelte, Aiguptate khut ah suak leh sal atan nau apat Pathian in amite ahukdam guat na thu kichian tak mu daw thei ahi. Pharaoh kiang ah Mosi'n, Israelte sal apat pawt-sak ding ah dawtna ava bawl apha! piaklo ziak a Aigupta gam sung zosia'n gawtna huaisia tak atuak dan uh mu ahi.

Lalpa'n Mosi kiang in, “La khut chu van lam in vak zak tiam in, Aigupta gam sung ah thimna, khoikhâk thei hial ding ah thim a zi'n theina ding in” atia. Mosi'n le a khut van lam in a vak zak ahileh ni thum hial Aigupta gam pumpi thimpi a zing hi. Kua ma akimutua thei le um talo in, ni thum sung chu a um nau mun ah kipat kichawndawk thei le a um ta puau. Zia phat chun, Pharaoh in Mosi a ko ah a kiang in, “Chi-au inla, Lalpa chu va ho tau in; la bawngteu leh la gan hawnteu nusiau inla, la naupangteu le pui

in chia tau in," ati.

Thim nuai ah umte chu'n a chiana ding uh ahia puau hi:

John 12:35na Jesu'n, "Zia vâk hi, hun chawm khat sung la lak un a um tadi hi, vâk la nei sung un chiau in, dan leh la chung un thimna hung tung intin; kuale thim lak ah tawite chun a chiana diu a hia puau hi" ati. Ziaziak-chun, kua man i malam ding gen lawk thei leh mu masa thei aki um pua. Hun lemchang i nei pet ahin zing leh thai ti zianglo in tuhun ahin sep leh bawl ding ah um chu sep mai ding ahi. I chung ah thimna hung tung phut ziang taleh ma sawn thei in um pua khai tiu.

Hun leh ni te aphot taklo ziakin, sem man talo in um khai tiu. Ni vak i mu sung ahin gunchu takin sem leh bawl in hinkhua mat ding ahi. A chutilo chun, sem leh bawl theilo leh i chia na ding het-hiamlo ah i um na ding hun hung tung ngei ding ahi.

Thim nuai ah umte salvaktu ding gingtute ahi:

Isai 42: 16na "Mitthum chu lamlan hiatkhaklo'na kai-bat ing ka tin, a lampi hiatkhak lonau ah chun pui huai ding ka hi. A ma-ang ua thimna zosia vaksak ing ka tin; lampi phawt lek

luk chu hi nam piak ding ka hi. Zia thilte chu bawl piak ding ka hi ziakin, amau chu nusia lo ding ka hi" ti'n ala gen hi.

A chung ah imu gual un gingtute hi "thim lak leh thina lim nuai ah a la chute, salvak ding leh thamuanna lampi lam ah, I kengteu pui ding in" Lalpa'n ei dawi ui. Matt. 5: 16na lam ah imu 'la vak uh chu mite mit mu in vak ta hen; tichun, la thil hi phat-teu chu mu'n, van ah la pau chu chawihawi thei in au,' ti ziak gual in.

--o0o--

LA INSUNG MITE KISIAM TUP IN

~Ajang Haokip

“Lalpa’n zia gual hin a hung gen hi: ‘La Insung sutûp in, thi ding la hi ta’ngal in; damdawk talo ding la hi, ti’n” a gen ah.

NewYork a cheng Dr. Langdale kitipa chu gari’n ahung tatkha tan, Doctor te’n dakkal 2(hrs) bep damding ahi dan ah tep piak tau ah. Azi achat’en a umkimvel un a kâpan tau ah, Dakkal 2(hrs) sung azi achate sukdik nale kithakna’n ala mangkhawm tau ah.

1. AZINU: Kadoi tak, ka-it tak, ka ngaipen, genthei haksatna zosia, ila tuak khawmzing in, ka tak-sap hun in le Leila suhal zingin, ka vaikuan/vaitun in le hepina neitak in lei enkawl zingin, la maisua ah Khrista mel akilang zing in, la kianga umjing kanuam in, lakam dam awnem chun chawldamna eipia zing hi. Ahin hung ngai mama lengle kikhen lothei ihitak lou jïakin, kumtuang kawlni ahung suaka iki mutua kit machan a dingin Good Night tin avaiythak ta ahi.

2. MARY: Kachanu lianpen nungak melhoi tak, nulepa kipaksak zing insung sunuam pen lahi. Christian hoitak khat lahi ziakin Christian insung hoitak khat hung siamdok ding in kahung kineppi mama la hi. Ka-ittak kachanu


Kumtuang gam adi’n Good Night tin atha kit ta ahi


3. A Chapa Upa pen: Kachapa dawitak van Jerusalem lahungtung phatleh lachan dingchu alopi nalawm lawm dinge, La Pathian chu hung nusia himhimkin la, adawi gualin la kal hung suanzing ziangin. Ka chapa dawitak kumtuang gama dingin Good Night ti’n a gen hi.

4. Grace: Hi aneupen ahin, achunga hi aupa CHARLIE um maleh anaunu jawk ahung ko masa’n. Kachanu doitak lahung pianni achun insunga ninou hung suakthak gualin insung lala sulim mama ziang hi. Christa la neina le asawt le a sawt naipuan laki-pak thei mama ziang hi. Kangaitak kachanu neupen Kumtuang


gama ding in Good Night atii.

5. CHARLIE: Anunungpenin Charlie ahung ko tan, Charlie kaki-nepna pipen kachapa lahi, Ahin lanulepa lasu lunggim zing hi lahet zing ding kaging cha'i. Lampi nuamzaw lazui zingin, Jesu kod-ing in le la la khanglo naipua'n. Himaleh ka hung kineppi tho tho nalai a, Kumtuang gama ding in "Good Bye" ahung ti ta ahi.


 Charlie in hepa kanuleh kasuapi te Good Night la ti'n kei "Good bye" leiti kanuampuai atita ahi. Apa'n, Charlie lanuleh lasuapite keitawh kumtuang gama ki mutua kitdi kahi zia ua Good night kati ahi, nang tawh-vang ki mutua kit talo ding ihi ziaka "Good Bye," tia kathak lahitai atileh , a hun hun in Charlie chu ahung kisik in Jesu chu Lal leh Hukdampa di'ng in a hung pawm ta ahi.


 Apachun, Charlie lunggil tak ah lati taktak nam? atileh aman Pathian in ahenai hepa ti'n a dawnhu ah, zia phat chun apa'n le Pathian in la dawtna gual gual in hung san piak taken, tunvang kachapa kumtuang gama di'n


'GOOD NIGHT' tin maitai takin azi achate athakdaw zaw zaw in alei hinkhua chu abeita ahi. Vainungin Charlie hi thugen minthang takkhat ahunghitai.

 Dakkal ni 2(hrs)sunga dingcho ah nattawk awlna damdawi akappiak uchu ahung kichaita kingaimama leule kumtuang gama dinga kikhenna kawlni ahungsuak tak ziakin kithaleh ngawi ngawi pumin kumtuang gama kimutua kitding kinem pumin ala kikhen tau ahi.


INGAITUA KHAWM DI


 A diakin Pate, Dr. Langdale te insung chanchin hin lam chuam chuam a eiki hopi ngei ding in ginchat aum hi. Dr. Langdale dinmun hi eiuh dinmun le bang l ti diam uh? l zi l chateu Kumtuang gama dinga iki siamtup zou nau em?

 Insung kuangtawl(sailor)hi Pate hi ahiu in; Asunga chuang (passenger)techu insung mite hi ahiu. La ji lachate chu khoilam zuanin la pui em?_


 Insung siam/suktup hi Pate mawpuakna ahi ziakin; la Insung

chu la hepi tak tak ahileh nang-
ma kisudik masa phot in._

 Ka insung adampuai ti he a
khoksa lo Pa chu; Pathi kiti ahi."

 Dr. Langdale in vang dak-
kal 2(hrs)sungbep luta a insung
ana kisiamtup zoin lungawi takin
akumtuang mun ding ala zuan ta
ahi. Tuni'n eiun le Dr. Langdale
guala ikumtuang mun zuanding
hita leuhin Dr. Langdale gual-
in ilunguh a-awi jou nadiam?

Kisik a hinkhua kisukdik thei nahi
khawvel chung bep in ineithei uh
ahi.

 Achaina ding in, Eima Insung
kisukdik ding sanga pawimaw
zaw thildang bang buaipi ding
I nei nalai uh em?Tuni'n thiam
kichan leu hin le nikhat ni phatleh
thiam changzou ding I nau em?

--o0o--

NANG PATHIAN LA GING GUALIN, PATHENI NANG AHUNG GINGCHA NA DIAM ?

**By Shonkhogin Hegin Haokip
Maranatha Cottage Hebron Veng
Phaipijang Langol
Imphal West Dist, Manipur.**

“Ama’n Naupang chung ah khan la khut tha kin la. Ama kha bangma law diak kin, la chapa neisun lei piak ding la itchak lo ziakin Pathian la lau hi ti tuhin ka hechian tai,” a hun tia. Gen.22:12.

Suapite haw, Pathen ging ki-tihi eiman I ging po leh apha ahi ziang puai eiman I ging gual in I Pathian in ei gingchak thei angai hi. Alang alanga ki gingchak tua a ngai hi. Tekhinna’n nangin mikhat chu banggual in gingcha ma ma le chun le aman nang ahung gingchak lo leh a ma apat phatchuam na bangma mu lo ding la ahi. Zia hi business transaction bawl tawh kibang ahi. Business bawl te khu akigingchak thei dan uh hi thupi tak a hi. Thil chawding pa ngei in le a gingchak ma ma zal ah chun gamla tak ah um a thil zuak pa kianga chu sum a lakh lakh in a thawt sek in kinemtak in a ngak sek ahi. Chuleh Thilzuakpa’n le a thil haw

chu gamla tak ah um a partner pa kianga chun ki gingchak tua na zal ah chun a lakh lakh man thilte chu bat ah thawt in kinem tak ah a ngak sek ahi

Ziagual tawh bang kigingchak-na chu pawimaw ahi. Eion Pathian Bang ziaka I ging uh hem I ti leh, amasapena chu, kumtuang hinna I nei theina ding ua I ging uh ahi, I ginnau chu a dik ahi chun Pathian in ei uh le eigingcha ding ahi, ahin lah zou leh nal ahi leh vang Pathian gingchak gingtu ki hilo ding ahi. Ziaziakchun, eion ging ma leu hin, Pathian Gingchak thei I hi lo uh chun bangma phachuam lo ding ahi. A panina chu ahi leh, gingtu diktak khat I hui leh hinkhua thiangtho leh umchanpha aman tamdan chu hawitak ah he ngei ding I hui. Zi-aziak chun, hinkhua thiangtho leh umchan pha la nei ding tina ahi. A pathumna chu ahileh, Pathian cha diktak khat la hi ah hinkhua

thiangtho mang ah umchanpha um la hi leh nang ziaka mitamtak in malsawmna hung dawng ding ahiau.

Ziaziakchun, Khristian khat kihi ngal ah Chamna leh lungmuanna dik tak kineilo, I hina chungga kipakna kineilo chuleh thianthona leh umchanpha taka ah hinkhua manglo Pathian malsawmna chang dingdawl chang lo la hileh tuni'n ki khual chian kit in, nangma ngei le kipak lo ding la hi. Ahileh ziagual a Pathian ginna thu a chungga kigen zosia chu la neilo leh kua mitmaw ziak ahi diam? Pathian maw ahi diam ahiloleh nangmaw ahi diam? Buaina khat aum hi ti chu hetsa ahi tai. Zia hi bang ziak ah hiti thei ahem I ti leh nanging Pathian kaging hi la tin ahinla Pathianin nang ahung gingchak lo ziak ah khuti thei ahi. Ziaziakchun, eiman banggualin ging ma le hin le I ging Pa Pathian in ei gingchak lo ahi leh Bangma muding um lo ahi. Aziakchu Ama mitmu ah gingchat umlo chu kuan bangga hung ngansia thei ding ahem? Bible in hukdamna lopi hi ngaisak lo leu hin bangti'n suakcha ding I hieu em a ti gual ngei in, Pathian gingchak thei I hi lo uh chun

ziagual hukdamna lopi hi hung ki pelo ding I hieu.

Chuti ahileh bang law ding I tau em I ti leh, a dawnhu-na chu Abraham hinkhua a pat in kihil hitiu. Abraham hi Pathian in a inkuan te lak a pat in ala kodawk a, bang dinga a ko daw hem I ti leh, malsawm dingah ala kodaw ahi. Bang malsawmna hem I ti leh, amasa pen in Pathian in a chile nam ding in ala ko ah. Zia ban ah chu a melmate gam a lakpiak ah amau gam hiding ahi ala ti ahi. Chuleh Ama ziak ah namtin, phungtin malsawm hi ding ahiau a la ti ahi. Zia gual thupiak chu aum vang in a mawk gingchak puan, ahinla Pathian in Abraham ginna diktak chu a chapa changkhat ganca thasang ah kithawina lan ding in a dawn ah, a hung bawl phat in, Pathianin Abraham kiangin “ Zia thil hi la hi tak ziak leh, la chapa neisunle itcha lo ah lei piak tak ziak in, keima ka kitiam hi, Lalpa'n a ti'n. Hun malzawl ngei ngei ing ka tin, van ah aksi jat leh tuisuagiat pâm ah piaunel jat in la suante hi'pung ing ka tin, la suante chun a mêlmateu kul kotkhak hun lak piak in au ala ti ahi. Gen. 22:15-18

La Bawl zosia ahawi di leh aphapen ding in bawl in

(Matthai 26: 13; Ecclesiastes 9:10)

~Dr. S. Chongloi

March 17, Hi (Britanica) ah St. Patrick thini ahi tin ala kigen dungzui in zia ni hi **St. Patrick's Day** tin adiak in Roman catholic kochuam ten kum sin in ala mat sek uh ahi. Zia hun amat dan uhi St. Patrick in Ireland gamsunga chanchinpha ala puak lut tepete na leh athilbawl pha haw hetzingna ala mat sek uh ahin, chun zia ni hin Patrick in adawi thingna eng rong (green colour)in kochuam mipi haw chu aki van sek un nun nawp abawl sek uh ahi. Ama hi Wales gama anapiang ahin apa chu Calpornius ahin kochuam hotu khat le ala hi. Irish gammi ten kum 16 vel ahi in suak dinga ala kimat ua Ireland ana tut-u ahi.

Ireland a chun kum 6 vel ahung um nung in apau uh phatak in ahung kizil pan in, zia chu a khawnung in chanchinpha agen na achun apha chuam mama ahi.

A belaam chinna a Patrick chun Lalpa Jesu ala kisan ahitai. Kum phabep zaw in asal tan na kipat in ahung zam dawka a agam-u England ahung tung kit tan, zia zaw achun, France a missionary kizil na (training) in ava chia hi, akum 43 atin in Bishop ding in namdet ahitai. Bishop ahi nung in AD 342 vel'a chun Ireland gam in ala sawl lut uh ahi.

Patrick lut masanga Ireland te hin pathian tampi ala hou uh ahi, hinla aman Pathian diktak agen piak tan zia phat achun khristian ahung hipan-bep uh ahi. Ei uh thingtang mite gual in amau hinle khaw Hausa ala kinei uh ahi, Hausa te chu khristian ahung hi phat uleh akhaw chaga zosia le khristian ahung himai sek uh ahi. Patrick in Ireland pumpi chu achuan suak hial ziang ahi, Hausa haw zosia le khristian ahisak suak kei ziang hi. Ireland pumpi

chun hukdam chanchipha aki san suak kei ziang tau ahi. A Pathian a taksan det zia leh mi ahip dan mak leh lamdang asa khop mai uh ahi, ama thuhil na apat in Ireland mi muntin'a chanchinpha puang ding in ahungkuan daw phat un Christianity hi, hattak in vannuai in hattak in ahung kithang ta ahi.

Jesu, Bethany khua Simon mipah pa inna aumpet in numei khat in thau mantam tak ahun chawi in Jesu keng a nupiak ahi. Zia athilpha bawl chung a chun Jesun, "Ti-

matakin ka genlahiu, kua kiang hita leh vanuaia zia chanchinpha kigen naphawta zianu thilpha bawl hi ama hetzing na dinga kigen khawmzing ding ahii," ala ti ahi. Pathian adinga i nasep-u hi thada lo hiala'a ahawipen leh apha pen a isep ahi chun tunung tianga le tepte theia umzing ding ahi ti hemil puai tiu. Thugen tun, "La sep zosia thada lo hial in'sem in, a ziak chu la chenna ding mithi khua achun sep ding leh lunggel, hetna le pilna te ala bei ta ding ahi" ati.

--o0o--

Dik la sa em?

By:- Rev. N. Dalla

1. Mi phatna mu theilo pen inle mi siatna a muthei ua, mi pākchâtna châng helo pen inle, mi sawisel na châng a he tei sek uh ahi.
2. Mi thilpha bawl khatvei chale 'aphai' tia pākcha nuam mawng mawng lo te'nle, mi sukhialna neucha a mu leh gên kâl a ngakla ma ma sek uh ahi.
3. Thilpha bawl dawna châng helo te'nle, thil phalo bawl dan a thiam tei sek ua, apha pawdawk theilo pen inle a phalo bawldan ahe ma ma sek uh ahi.
4. Mu'dan diklo ah mi a mu man ah, a bawl daw zosia le a phalo ding gual ah mu ziang, ti hile umthei talua ahia, a phalo mêl ah a mu tâk ziak ah, thupha bangzat gen lele pawm thei talo mi umsek ahia.
5. Gam leh nam mipi â ding ah napha sem tu kua ahem, ti ngaitua lo hial ah, ahun hun ah sum leh pai i muthei theina ahi phawt leh kua hile le khawk salo i tam nâklai ziak un, i gam lungsiat tu ding puitu pha i ki teldaw thei ngai seklo uh ahi.
6. Munkhat ah le sum va kilak, mundang khat ale va kilak zel, ningtin ah sum lak khawmna ding hawl vel vel lawi aki um khâksek ziaikin, i gam politics saidan uhi a hisel tak tak theilo ahi.
7. Sum eipia tam tam ti ah lunggel hun ahi ta pua, i khristian gam uhi thi leh man kâl ah ding ihi tau ah, i gam puitu ding i kitel khial ua leh a chawkha kihi mai ding ahi ei..!
8. I gam ah thudik tângkopi ngam i tawm hiai hiai tâk ziak un, thudik chanve in nasatak in ei thunun zo ta, "Mihing ngaidan ah lamdik hileh kilawm, a tawpna chu thina ahi" ti lampi hi hawkhâk a bail-am ma ma ahi. (Thupilte 14:12:, 16:25)
9. Gam leh nam mipi â ding ah napha sem tu kua ahem, ti ngaitua lo hial ah, ahun hun ah sum leh pai i muthei theina ahi phawt leh kua hile le khawk salo i tam nâklai ziak un, i gam lungsiat tu ding puitu pha i ki teldaw thei ngai seklo uh ahi.
10. Munkhat ah le sum va kilak, mundang khat ale va kilak zel, ning-

- tin ah sum lak khawmna ding hawl vel vel lawi aki um khâksek ziakin, i gam politics saidan uhi a hisel tak tak theilo ahi.
11. Sum eipia tam tam ti ah lunggel hun ahi ta pua, i khristian gam uhi thi leh man kâl ah ding ihi tau ah, i gam puitu ding i kitel khial ua leh a chawkha kihi mai ding ahi ei..!
 12. I gam ah thudik tângkopi ngam i tawm hiai hiai tâk ziak un, thudik chanve in nasatak in ei thunun zo ta, “Mihing ngaidan ah lamdik hileh kilawm, a tawpna chu thina ahi” ti lampi hi hawkhâk a bail-am ma ma ahi. (Thupilte 14:12, 16:25)
 13. Party hât lam lam ah pang ziang, thanuam ziang, lunglût ziang, tailût ziang kiti haw hin kinepna khat nei ahiu ah, a kinepnau gual ah thil a mulo phat ua leh taimang kit ziang sek ahiu.
 14. Juda Iskariot khanle kinepna khat neizing pum in Jesu ala zui ahi tuak ah, a kinepna gual ah thil a umlo phât in, dangka sawmthum ah zuakin a kilepsan tamaï ahi ai khah!
 15. Malzawlna dawn ding kinepna leh Inchen louchen phat theina ding bep kinepna ah Jesu nungzui te'nle a duthusam gual ua thil a mulo phât ua leh, Juda gualin a hukdampa a kilep san tasek uh ahi.
 16. Party khat ah le gin umtak ah umdên theilo ah chawm vêt vêt ziangte bawm, kuama taksan theilo ahiu leh, Khrista nungzuina vang vang ahin gin umlo san khâk ding hi thil lau umtak ahi ei..!
 17. La phuaktu chun “Jesu nei chu vannuai tawh kikhenna” ahi atia, eilawi mi tamtak Jesu nei kahi kiti ngal in khawvel tawh ki khentheï mawng mawnglo, khawvel gualpha ah nei zing ziang nalai aki tam ma ma ahi.
 18. I Pathian thu chun “Pathian ah piang tapo in khawvel hi a nuaisia sek ngal in..” a tia (1 John 5:4) eilawi chu Pathian ah piang kahi kiti chiat ngal in, khawvel nuaisia zo ma ma lo, khawvel in a thu thu ah ei matchâk theï a ki tam ma ma nalai ahi.
 19. Hepi Johan chun “Suapite haw khawvel in ahun huat hi maksa kiu in” ala tia (1 John 3:13) tulai khristiante haw pi hila aw awh!.. khawvel in a huat ziak ah maksak um sangin, khawvel tawh a kiho theï bêk ziak ah maksak um le lam a ki tam ta ahi.

20. Jesu chun “nanghaw khawvel mi lahi ta puau a, khawvel ah mi ka têtldaw la hizawu ah, ziaziak chun khawvel in a huat lahiu” ei tia, (John 15:19) eilawi umchan hila i etleh khawvel huat thei ding hial ah, gingu nun pawdawk zo le ki umlo, a khawvel tawh kiho theina ding ngawn bep ki ngaitua..!
21. Ki pumkhat tak ah thil diklo bawl khawm sâng in, ki tuaklo leu hinle thilpha ila bawl chiat nâk ahi chun, a vainung leh a phatna ala umzaw sek ahi.
22. Pankhawm hâtna hi thil phalam bep ah dik ahi pua, thil phalo lam ah pankhawm hinle hâtna umthei tho ahi.
23. Khawvel thil ah gual zawna chu mi chung ah kilap sân ah thunei khum hi ahia, Pathian thu ah gual zawna ahi leh vâng, nuailût kichu tuana hi ahi.
24. Insung hileh khawtâng hi taleh, namsung ziang ale ki lunggual tak ah i umthei sek lonau liantak mai chu, thului i hiat milthei seklo ziak uh ala hi nuam ma ma ahi.
25. Kochuam leh khawtâng ahin khanglaite hi za lak ah sawmgiat vel hisek ahia, thilpha a tun leh le khanglaite zal ahia, thil phalo a tun leh le khanglaite ziak ma hizêl ahi.
26. Tu chung kitêlpina hun ale, buaina umlo na mun haw hi, i khanglaiteu phatna zal ti'thei ahia, buaina nasatak atunna mun haw hile i khanglaiteu ziak ahi ti'thei hi zel ahi.
27. Kochuam tin ah khristian khanglai taikhawm ah vote khia i hui ah, kinakna, kinialna umna mun leh, mipi sulau ah, a dawî gual ua vote khiaksak theilo kiti na mun haw zosia hile i khanglaiteu ziak ma hizel ei vei..!
28. Lawi upa leh thunei kahi kiti haw hin, i khanglaiteu hi matdan dik ah i matchâk ua leh i gam, i nam damna hi'n tin, matdan diklo ah i matchâk khâk ngei ngei ua leh vâng, i luza'ng ua mei âm ki buak khum i hung hidu ahi.
29. Judate'n a Sabbath niu a ngai pawimaw taluau ah, Sabbath neitu Lal Jesu a nawl ua, ei unle Pathianni i za'bawl ua, nidang leh Pathian zâkda ding bawl khaw i salo uh ahi.
30. Pathianni vote khiak chu thil phalo in i ngai thei ua, thil kipak um-

- tak ahi zing lai in, thawtanni ah diklo tak ah vote khiak chu khawk i sak kîto uhi thilmak tak hi kît ahi.
31. Biakin ah Pathian thu phatak in i zui thei ua, mundang ah Pathian umlo i batsak kît sek uhi thil lamdang tak ahi.
 32. Sawmakhat piak hi i ngai pawimaw thei tau ah, kipak um ma ma ahi zinglai in, sawm lak ah pakuate kha bang gualin i mang sek awm? ti hi i ngaitua ngai seklo uh ahi.
 33. Bible ah chapa taimang pa kha a vêl vêl ah a taimang kît lam aki he pua, ei uh ihu leh a vêl a vêl in Pathian â pat ila taimang kha sek uh ahi.
 34. Chapa taimang pa kha vawk ankuang bul ah hung khanglo ahia, eilawi mi tamtakte hi vawk ankuang bul sang ah khawk zaw i tun tiang ua le khanglo thei nailo a ki tam ahi.
 35. Chapa taimang pa khan a hunlai in apa kiang lam zawt nachâng ala he, a vangpha, eilawi mitam tak hin gitlo i hi i kihiat nung ale Pathian hawl nachâng helo a ki tam sek ahi.
 36. Chapa taimang pa chanchin hi i sim phat tak leh, kua ahem khat chanchin gual mai ahi pua, migilote Pathian kiti ding zakchalo leh hepi tun tun ziang Pa Pathian leh ama angung apat taimang nang leh kei chanchin ala hi zaw ei vei..!
 37. I Bible in “Mi nunnem chun Lalpa ah kipat kipakna thak chang in-tin..” atia (Isai 29:19) thagum, thahât ah lawtinna leh gual zawna i nei ua, i kipak sek nau haw hi vâng Lalpa apat kipakna ala hilo hial didan ahi.
 38. Job chun “A gualpha chung ah nunnem nuamlote chu, Hat chungnung Pathian launa neilo ahiu” atia (Job 6:14) achuti leh tulai i umdan teu hi i etleh Pathian lau hi ki tamlo ten dingdan ahi.
 39. Peter chun “Nunnem leh za um tak ah um in, sia leh pha hetna chîm tak nei unla..” atia (1Pet. 3:16) tulai i umdan teu hi i etleh sia leh pha hetna chîm tak nei ihi tawl na diu em? nunemna leh za umna muding a vâng ma ma ta ahi.
 40. Chunglam apat pilna hung suk lak achun “dawha him him panglo ahi” a tia (Jak. 3:17) tulai mite pilna hi khawilam apat hung kipan atam..! ki dawha bawl na ngenchang in a dimta ahi..!

GITLONA BUL

(The Beginning of sin)

By- Ng, Naocy Haokip

Pathian lungsiatna leh khawtuana I chan ziakun tuni tianga Pathian thuhing ki hil khawmthei ah, simthaw mai himaleh kihoulim zing thein- alai ding ah damna hunhawi ei petu Pathian chu chawihawi in um hen.

“Gitlona bul,” ti thupi mangchan chawmcha holim khawm kit’ hitiu.

Gitlona hi khoi tak a pat hung kipan ahem? Chuleh gitlo kiti hi bang ahia bang I bawl ziak ua gilo ki hi sek ahem?

Zia thudawl ahin I hetkham kham un chawmcha’n holim khawm hitiu.

Bible text:- Isaiah 14:12-15
Ezekiel 28:13-17

☞ Isaiah 14:12 ☞

“Aw jingsol, phalvak chapa bangtidan ah van ah kipat hung ketha ziang la hem! Nang, namtin kiakniamsakpa, bangtidan ah lei tual chan ah, phuk pai ah hung um ziang la hi tam!

Lucifer hi Hebrai pau ahin, Eipau a “jingsol , phalvak chapa” kiti ahi, Lucifer amahi ahi gitlona bulpi!

Bang ziak ah Lucifer hi gitlona bulpi hithei ahem? Pathian in a chapa hoina suang mantam in athuamin chapa nuaideu ah

akawi ahi, a hinla apamun tudet nuam loin asiamtu panmun jawk ahung chu’ta’n Lucifer’a dingin Pathian lalchutpha chut ding chu pha ma ma ahi.

Ahinla Pathiana dinga thilpha hilo hial ding ahi, Lucifer hin ama a dinga thilpha aki-ngaitua ahin, asiampa Pathian a dingin vang thil dawiumlo tak ahi, Pathian lungthim in Lucifer hi gilo ahitai ahinla Lucifer hi thilgilo bawlin aki-ngaitua puai.

EXAMPLE÷

MU (eagle) khat’in akcha anak khu MU a dinga pha ma ma ahi, akcha neite a dingin vang chu

phalo/dawi umlo hial ahi, ahin-la het dinga pha chu akcha neite a dingin mu chu aphalo ahi, himaleh mu chun thilsia bawl ahi ti akihet puai.

GITLONA KITI HI BANG A HEM?

Thilphalo bawl, tualthat, gukchak, zudon, kiti te hi gitlona a hem? Ziate hung kipatdawna chu lungthim ahi'n, zia lungthim chu ahi gitlona hung kipatna chu!

GITLONA KITI HI÷

English pavin 'SIN' kiti ahi.

Greek pavin 'HEMARCI' akitin.

Eipau in 'TUP-KHIAL' akiti.

BANG DINGA TUP-KHIAL KITI A HEM?

Lucifer'in Pathian lalchutpha a chut ding chu alatup ahin, atup zaw lo ziak ah chun "TUP-KHIAL" kiti ahi, Lucifer thiltup chu Pathian a dingin thilpha ahi na diam? Thilpha hilou hial ahi.

LUNGTHIM HI GILO AHI

EXAMPLE:-

Nungak mel-hoi hung mu sak chu lalungthim ahin, amu tu chu lamit ahi.

Ju(Wine) hung dawn sak chu la lungthim ahin, la dawn na chu la kam ahi.

Hung gukchak sak chu la lungthim ahin, a gu tu chu la khut ahi.

La lungthim in gel lo leh la zuan thei na diam? Thilphalo la gelna la lungthim hi gitlona ahi, lungthima gel kei lo ah asia kibawl lo ahi.

Sepna nei khat in ama sepna mun doilo ah, ama sanga thuneizaw khat panmun chu dawu ta hen lang hi taleh ama ding in pha mama intin, ahinla a sanga thunei zaw pa a ding in vang thilpha hi kei lo ding ahin, lungnat um tak hi ding ahi.

SETAN HI A UM TAK TAK NA DIAM?

(Is Satan in real?)

Matthai 4:1-5 sung sim leu hin he thei ding l hui,

"Ziazaw chun, Jesu chu diabol thep ah um dingin gamthip ah Thagau pui lut in a um ta'n".

Job 1:7 Lalpa chun Setan kiang ah, "Khoi lam ah kipat hung la hem? ti'n a dong ah.

Job 2:1 Setan chule Lalpa kiang ah kilak dingin ahung a.

Luka 10:18 Himaleh, ama'n a kiang un, "Setan Van ah kipat kawlphe gual ah hung ketha ka mui.

Zia Bible Chang haw hi I sim chun setan hi um taktak ahi ti muthei ahi.

SETAN MINTE:-

1. Dragon – Dragon ti thumal hi "Do lungpu" tina ahi, Do lungpu ti chu Pathian dopa ahiziak ahi. Bang ziaka Pathian do kiti a hem?

Ama a ding cho ah thilpha bawl a, Pathian Lalchutpha aki chu pi ziak in dolungpu kiti ahi.

Nang le dolung la pu em?

Revelation 12: 4&7

2. GULLUI – Gullui ti thumal hi sawtpi a pat ala umsa ahi tai, Gul thilbawl chu bang hem I ti leh michuk hi ahi pen hi.

Nang mi la chu sek em? Mi chuk ti hi migensiat, Pathian do ah kamka, thugen chu leh ama ading bep ah thilpha bawl mi a ding ah pha bawl lo. Ama ding bep ah thilpha gel Gul Lucifer chu ahi. Revelation 12:9

3. DIABOL- Diabol ti thumal hi milthep hat, mithep dan thiam, zogen thiam tina ahi.

Zuau la gen sek em? Zuau gen kiti hi khoi ah pat hung kipan dawk ahem? Khawvel ah hung kipan ahem? Hilo ahi Van ah kipan ahitai. Kuan ahung pat ahem? Diabol in a pat ahi. Pathian Van-sawlchak sethum sua sekhat zo thiam tak in a hung them tha ahi. Revelation 12:4 Zuau gen kiti hi khawvel ah kipan hiloin, Vana kipan ahi dan a ki mui

4. SETAN – Setan kiti thumal hi, Pathian melma tina ahi, bang dinga Pathian melma kiti a hem? Pathian lunglam bawl lo ah ama lungthim doidan dan a um in Pathian lalchutpha chut ding lungthim a nei ziak ahi.

Ama a dinga thilpha bawl himaleh Pathian melma ahung hitai, Pathian melma ti hi bang ki genna a hem? Pathian dawigual ah hinkhua mangtheilo tina ahi, Bang dinga Pathian doigual ah hinkhua mang theilo hem? Ama a ding bep a thilpha a gel ziak ahi, ama ading bep ah thilpha a gelna chu khawi ah hung kipan hem I ti leh? A lungthim ah hung kipan ahi.

Isaiah 14:13 Kei/Keima kiti thumal hin agen ta ahi, kiletsakna, kithupi sakna, lalcutpha chu, Pathian guala um gua, Pathian

dona chu ahung neitai.

Lungthim panglo in Pathian doigual ah hinkhua la mang thei diam?

Revelation 12:9 Setan kiti min pali (Four name) I hung gen tau ah, zia min pali chu Setan hina ahi.

Gitlona kiti hi Matthai 15:18 in Kam ah kipat hung pawtte ahileh vang, lunggil sung lam ah kipat hung pawt ahiziak in, zia ngei chun mihing ahi buak sek hi.

“GITLONA BUL” ti Thupi mangcha chawmcha iholim nau ah adiklo Genkhial a um leh Christa min in ki ngaidam hitiu.

Simtute zosia lungthim in Pathian in hetchian theina lunggel hung pe chiat hen la, taksa leh thagau ah kal I suanbe zel thei na ding un Lalpa Pathian angsung in ka lan ahi. Amen!

--o0o--

BIBLE AH BAPTISMA CHI GUK TE.

 Samuel Satminthang Kipgen

–“Tulai in Doctrine chuam chuam a pawt tawh kitawn in leh ginna zat chuam chuam te ziakin in Baptisma chan dan hi le a chi chuam chiat aum gam ta ahi chuleh Baptisma bawlo, pawmlou kei le aum hi. Hiziangta lele tu hin Bible a Baptisma umte ala gen hitiu.

1. ISERAL BAPTISMA (Baptize of Israel)

 1 Corinth 10:2

Mosi zui ahi thei na ding in sumpi leh tuip'n Baptisma a chang ui.

Zia hi thuthung thak Baptisma tawh kibang lo ahi. Ahinla Israel te chu Mosi nungzui ahi theina ding un sumpi leh tuip'n bangtisma ala chang uh ahi. (1 Cor.10:2). A ziak chu Mosi nung ah kitawl Israel mipite chun tuipi chu leihul chung gual ah a pal un, sumpi'n a pui dungzui ah a chiau chu Baptisma ti'n ki gen ahi. Zi chu a taktak Baptisma ahi puan, a etsakna ahi zawi . Zia Israel Mipite'n Mosi ah Baptisma ala bawl uh tina ahi. (1 Cor. 10:1-2).

2. JOHAN BAPTISMA (Baptism of John the Baptize)

Matt.3:11, Luka 3:16

 Matthew 3:11

Keima'n gitlo haisanna di'n tui in ka hung baptis ahi.

i) Gitlo haisanna dinga Baptisma a chansak.

ii) Kisiamthakna dinga Baptisma achansak ahi.

3. JESU BAPTISMA (Baptism of Jesus):

 Matthew 3:16-17

16. Jesu Baptisma a chan zaw ah tuilak ah kipat a hung pawt phatin, Van a hung kihawng a, Pathian Thagau chu vakhu gual in a hung suk ah, a chung ah a hung chu a mu tai.

17. Chuleh, Van ah kipat aw gi chun, “Zia hi ka Chapa dawitak, Ka kipakna ma ma chu ahi,” a hun tia.

Jesu Khrista Baptisma chan chu Thiampu na ah sep patna dinga chang ahi. Pianthakna thun kigen ziang ta lele Jesu

Christa chu thagau thiangotho 'a kizil'ah hungpiang ahiziak in chun piangthaksa ahi. Ziakiakchun Jesu adinga pianthak ngailo ahi.

4. THAGAU THIANGTHO AH BAPTIS (Baptize of the Holy Spirit)

 Mark 1:8

Keima'n tui in ka hun baptis in, ama chun vang Thagau Thiangotho in hun baptis ding ahi," atia. Thagau Thiangotho Baptis kiti hi migilo khat in Jesu Khrista ahung ging a agitlo akisik'a, chuleh, Jesu Khrista a lal leh Hukdampa ding ah pawm lai tak chu Thagau thiangotho in Khrista taksa ah a phumlutna a zawp matna chu thagau thiangotho ah Baptis kiti ahi. Pianthakna gen na ahi. (Math:3:11; Mk.1:8; Lk. 3:16; Act. 1:5). A pianthak lai tak chu Thagau thiangotho in a zawp mat ahi.

5. MEI AH BAPTIS (Baptism of fire):

Mei a Baptis kiti hi ginglo mi chungahun nunung ni ah thutanna, haksatna hung chu ding chu agenna ahi. A ziak chu a ginglo te hi nikhat nileh gaw-

tmun meidila ahung kiselut ding uh kigena ahi. Ziachu ginglo tute a ding ah mei'a Baptis kiti ahi. A ziak chu amau in Jesu a ginglo ziak ua meisa lak ah paithak ding ti kigen ahi. (Rev. 20:13-15; Math. 3:11; Lk. 3:16).

6 GINGTUTE BAPTIS (Baptism of Believers):

Gingtute Baptis kiti hi Khrista ging ah piangthak taten apiangthak nau suklatna ding ah abawl dingua thupiak ahi. Aziak chu gingtu ten sunglam'a Khrista gingtu ahi nau suklatna ding a tuia Baptis abawl uh ahi (Rome 6:1-4). Gingtute'n Khrista thina kibatpi ah ama tawh l kizop tâk ua leh, ama thawkitna kibatpi inle thokit ngei hitiu. (Rome 6:5) Khrista kiang in khetden in ka um ta'n, ahinla, ka hing hi; keima kha ka hita puan Khrista keima ah hing ahi zawi. (Gal 2:20); Baptisma ah ama tawh vui in la um tau a, zia ma ma chun mithi lak ah kipat Pathian nasep gingchak ziakin, ama tawh kigual in kaithaw la hitau hi. (Col.2:12); Ziakiakchun, a thina Baptisma chang in ama tawh vui in l um un; chutichun, Pa lopina chun mithi lak ah kipat Khrista a

kaithaw gual ma chun ei hawle Simtu te zosia Lalpa'n malsawm
hinna thak ah I hin thei na ding vek ta hen!
un. (Rome 6:4).

--o0o--

KHUAL/SUI, A HETDING HI JESU BEP AHI **(Philippians 3: 8-11; Hebrai 12: 2-3)**

By Dr. S. Chongloi

Sumkawlvei khang-dawng tangval hausa tak khat in film thaw actress nungak hawitak khat adawichan, kichenpi dingin aki ngaitua tak ziak Achun, Ahun achiasa ahinkhua chu dawum lou bangma aum, aumlou hetna ding in, michung thu khual thiam 'agency' khat achung thu khual/sui dingin agawi tan. Achung thu asui sak haw kianga chun ama kua ahi leh bangbawl'ahi achungthu akhual/sui ahi lam ahiat sak puai.

Achungthu sui dinga akin-gansia hawn phatak in asui chil'un atawp nan thutut ahung bawl tau a. Amau chun, *Zia nungaknu hin kitup tak in a hinkhua pha takin amang ahi. Hinla tukal lak cha chun ahina kichian bekset lo in, asuk asak bei in sumkawlvei tangval khat taw vang akihel ui.

Zia tilou chu aphant mawna bangma akimupuai"* ati piak tau ahi.

Khatvei vei leh eiun le mi chungthu khual'in hattak in ikisu lunggim un, a hinla, ei chungthu bang ahi ingai tua ngai puau ahi. Ei un mi chungthu ikhual/sui gual un, ei uh chungthu le midangin ei sui piak leu, eih zawk ginmaw umtaka hinkhua mang zaw i la hithei sek uh ahi. Ziak achun iki suk lunggim na ding uh chu midang chungthu khual sangin ei uh chungthu zawk iki ngaitua ding zawk uh ahi.

Sawlchak paul' in i het dinga adawipen tak chu Jesu khrista ahi. Ama aheth phat in thildang chu bangma'n angai talo ahi. *Ka-Lalpa Jesu khrista ka muchian na hin thildang zosia akhumkhel ta'n' thil dang zosia hi manthaina, bangmacha hilo

a ka-ngaitua ahi tai, Ama jal'a thil zosia hi kapaidawk a, khrista chu kaphatchuampi theina dingin adang hi bangma kagel ta puai... Ama thawkit thahatna kahet'a athawk gimna chu kathawk khompi a, athina guala chu kathi nuam ahi" ati ahi.

Ziaziak achun ei uh hinkhua chiat zawk kikhual thei leu hin, chen khawma leh hinkhawm le nuam in tin chuleh adiak in Pathian dawidan ah hinkho imat thei na pen uh hi ding inle taksan aum hi. Ki hothei na suse atamzaw le ei bang ihi ki ngaitua lo a midang sui'a gen siatna a pat hung suakdaw ahi sek hi. Midang i et phat uh leh a taksap nau bep a kimu sek in zia chun kipak na ei pe ngai puai.

Hebrai lekhabu zikpan, et ding hi khat bep ahi dan eigen piak ahi, "I gin nau siampa leh subukimpa Jesu lam en zing hitiu; ama chun ama lama kipak na chu thil in mualpho na chu ngainep in khross chu athuak a pathian lalchutpha changlam akhin ahang ki chu taii" ati. I khual/ngaitu ding uleh iet ding un chu Jesu ahin ihakhual chan'ua iha hetbe diu chuleh iha iet chan-ua ihinkhua kipak a haksatna le ithawk zaw diu ahi. Ziak a chun Lalpa Jesu bep en hitin ama thu bep khual in ngaitua ding in iki chial uh ahi.

--o0o--

Presbytery sung thu chuam chuam:- (Apr. '22)

1. Date 16th – 17th March 2022, a khan Guwahati ah Rev. S.T. Kaia Vaiphei, Executive Secretary, Upa. Thienkhomang, Finance Officer leh Mr. Thangzuankhawm, Driver ten KSP Gari ding Bolero B6 (O) latest model order kibawl chu a hung tun tak ziak in a va la tau ahi. A Gari man hi chu a tam bek pua, maleh registration hung kibawl leh 12 lakhs hung ting to vang ding ahi.
2. Date 2nd February 2022 ni khan Silchar ah Presbyterian Church of India (PCI) Executive Committee a um a, zia chun PCI Office Shillong ah Administrative Secretary ding kitelna a um a, Rev. S.T. Kaia Vaiphei, tu ah Executive Secretary, KSP hi tel tin ahi tai. Ama hin PCI. Office Shillong chu 1st June 2022 leh join pan ding ahi.
3. Rev. S.T. Kaia Vaiphei, Executive Secretary, KSP hi PCI office ah a um tak ding ziak in ama thasang ding in KSP Standing Committee chun Rev. D. Robert Thanga a guat a, ama hi TTS Madurai a pat M.Th zo in hung pawt ding ahi ta, KSP Executive Secretary hina chu Date 17th May 2022 in la pan in tin, tukum sung a puak ding ahi. Kum thak – 2023 leh Pastorte General Transfer and posting ding ahi tak ziak in mi chuam le hung hi kit mai thei ahi. Tuchung in interim (hun kallak sung) a ding bep ahi.
4. KSP kochuam tin in le hiatsakna a hung kihawm ta, Rev. S.T. Kaia Vaiphei, tu ah Executive Secretary hin Town District (Bial) le a puak khawm ahin, zia a bial hi 1st April 2022 a pat in Rev. Siam Phaltual, in a puak pat ahi tai. Chuleh Rev. Siam Phaltual, etkawl Shillong kochuam hi 1st April 2022, a pat Rev. S.T. Kaia Vaiphei etkawl na nuai ah um pan ahi tai.
5. Date 8th April 2022 (Friday) ni leh Head Quarters Presbyterian Church, Tuibuang ah Upate leh Tual Upate one day Seminar um ding ahin, resource person ding in i) Rev. Dr. Hangpi Manlun, Executive Secretary, ZPCS. ama topic ding in PCI Constitution – Interpretation and Elaboration leh ii) Rev. K. Muana, Field Secretary,

- TP. ama topic ding in Presbyterianism hi ding ahi. KSP Tual Upa leh Upate pang kim chiat ding ahi. TE/DA piak hi ding ahin, luaithena le um ding ahi.
6. Pathian Lalgam I nasepna a machal to zel a, tuhin PMS. Tispari School naupang 200 a val ta, a school in a dawl ta pua, keklet a ngai ta, teacher khat leh school mother ding le lak a pawimaw ta, teacherte a hapan ma mau a, period awng (hun-awng) um nei kei lo ah pang a hui a, damlo leh absent theilo hi mai ahi. Pauchap-na'n hezing hi tiu.
7. Khristiante La thiangtho revision bawlna chu a chiatha zing a, May thasang ah zaw man tei hileh ti ah revision Committee te thei tawp sua ah pang ahiu.

--o0o--

HIATSAKNA LEH DAWTNA

Jesu khrista thisan zal ah 'DAMNA AW' ngaitute haw zosia damna chibai. Chuleh 'DAMNA AW' hi kum 4 melmu thei ah ei kawitu Pathian chu lopina chang ta hen.

Chun, Subscription fee chungchang ah buaina nei leh a penuamte chu nicheng ah Office hour a kan leh piak thei zing ahi ti ka hun hiatsak hi.

[Editor- 8787379374]
Rev. Seilunlal Vaiphei

~Editorial Board

'DAMNA AW' PHUNGVUKTUTE :

PATRON MEMBERS :

- | | |
|-----------------------|-------------------------------|
| 1. Pu P. Vaiphei IAS, | Imphal |
| 2. Upa Henthianthang, | S.Kotlian |
| 3. T.Upa Haulallawm | S.Kotlian |
| 4. Upa Thienkhomang | S. Kotlian |
| 5. Upa Laltinkhup, | HQ. Church, Tuibuang |
| 6. Pi Manliankim, | HQ. Church, Tuibuang |
| 7. Upa D. Mina, | Lingsiphai |
| 8. T.Upa Ph. Gena, | Lingsiphai |
| 9. Pu. Khamlal | Saipum |
| 10. Pu Khamliankap | Saipum |
| 11. Pu. Tinlunlal | Saipum |
| 12, Pu. S.Kapbawi | New Delhi |
| 13. Upa Genhau | Central Church, Compound veng |
| 14. Pu. Khailianbawi | Central Church, Compound veng |
| 15. Pi Kimtawi | Kohima |
| 16. Tv. Daniel | Tangmual |

MEMORIAL GIFT :

- | | |
|--------------------------------|--|
| 1. Pi Deem Melody, | Central Church, (Rengkai)
<i>[In loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansawmthang | Lingsiphai
<i>[In loving memory of (L) Pu. Henzagen]</i> |
| 4. Pi. Nem Grace Boisi Capvung | Delhi
<i>[In loving memory of (L) Pi Vanlalchhuangi]</i> |

SUPPORTING MEMBERS :

- | | |
|---------------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi. Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11. Pu Lemthang | L. Mission Veng |
| 12. Rev. S.T.Kaia Vaiphei | Nghathal |
| 13. Nk. Dimkhoniang | Zikpi Tampak |

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siam, | L. Mission Veng |
| 4. Pi Chhungi | Hq. Tuibuang |
| 5. Pu S. Paumuan | Saipum |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBINOOO6182.

--o0o--